

Etxe erregionaletako lehendakariei biltzeko gonbita egin die Kontseiluak

«Bai euskarari» kanpainaren nondik norakoak aurkeztuko dizkiete gaurko afarian

Galizia, Andaluzia, Extremadura eta Euskal Herriko beste hainbat etxe erregionaletako kideek Euskararen Gizarte Erakundearen Kontseiluko ordezkariekin batera afalduko dute gaur gauean Deustuan, Bizkaian. Afariaren zioa XXI. mendeko akordioa: Bai euskarari kanpainaren berri ematea da.

Ainhoa Oiartzabal / Donostia

EUSKAL HERRIAN dauden etxe erregional guztiekin bildu eta Bai Euskarari kanpainaren berri emateko asmoa aspalditik zebilkien eskuartean Euskararen Gizarte Erakundearen Kontseiluak. Izan ere, euskara Euskal Herriko biztanle guztien altxorra dela diote. Hala, eta beste hainbat gairekin prentsaurreko mordo bat egin behar zituztela-eta, afaria egitea otu zitzaion. Esan eta egin, gaur iluntzean egingo dute aipatu afaria Deustuko (Bizkaia) Casa vasca jatetxean.

Ander Txintxurreta aritu da aipatu afaria antolatzen, eta Galizia etxeko lehendakari Juanjo Baña izan du laguntzaile. Kontseiluko partaide Txintxurretak azaldu digunez, afarian bertan emango zaie etxe erregionalei kanpainaren nondik norakoen, eta, Euskararen Gizarte Erakundearen Kontseiluaren berri. Beraz, behin afaria egin ondoren eta beren elkarteetan eztabaidatu ondoren erabakiko dute Bai Euskarari kanpainak proposatzen duen hitzarmen soziala sinatu edo ez.

Bestalde, afarirako gonbidapena gogo onez hartu dutela azaldu digu Kontseiluko kideak, eta aipatu etxe erregionaletako lehendakari —edo ordezkari— ugari joango direla aurreratu digu. Hala, Kontseiluak aditzera eman digunez, gutxienez 16 etxe erregionaletako ordezkariak hartuko dute parte afarian. Batik



Donostian bizi diren andaluziar batzuk Rocioko meza batean.

JAGOBA MANTEROLA

bat, Galizia, Extremadura eta Andaluziako etxe erregionaletako kideek hartuko dute parte gaurko afarian.

Gustura afaltzera gonbidatu dituztelako • Extremadurako etxe erregionaletako ordezkariak, Gasteiz eta Donostiakoak behinik behin, gustura agertu dira afaltzera gonbidatu dituztelako. Donostiako Santiago Gilek EGUNKARIAri azaldu dionez, afarian bertan izango dute Bai Euskarari kanpainaren berri: «Beraz, afaria egin eta gero jakingo dugu kanpaina horren bitartez zer egin nahi duten. Ondoren erabakiko dugu guk zer egin». Hala ere, gustura agertu da gizarteko talde edo elkarte direlako deitu dituztelako.

Gasteizko Valeriano Jabato, berriz, ez da afarira joango lana

Euskaltzaindiari ohore

EUSKARAREN Gizarte Erakundearen Kontseiluak bihar omenduko ditu Uztaritzen Euskaltzaindiko euskaltzainak. Izan ere, Kontseiluak herri mugimenduek egin duten lana plazaratzeko xedearekin euskalgintzan ari diren elkarteak omendu nahi ditu. Bestalde, Durangoko liburu azoka hasi dela-eta, bihar arratsaldean hainbat jende ospetsu izango da bertan. Bai Euskarari kanpainari buruzko informazioa banatzeko ariko dira euskal gizartean arras ezagunak diren aktore, kirolari eta bertsolariak. X

egin behar duelako. Bere iritziz, egun desegokia aukeratu dute afaria egiteko, «zubia denez, jende asko kanpora joaten baita». Era berean, ikasteak lekuri ez duela hartzen adierazi digu: «Ongi iruditzen zait gazteek eta haurrek euskara ikastea», zehaztu du. Horrezaz gainera, euskara jakitea lana bilatzeko lagungarria dela dio.

Laudioko etxe andaluziarreko lehendakari Julio Colominok euskararen alde dagoela adierazi digu: «Gu euskararen alde gaude, logikoa iruditzen zaigu hemen euskaraz hitz egitea eta ikastea». Beraz, gogo onez hartu dute Kontseiluak eginiko gonbidapena, eta afarira joango direla ziurtatu digute. Era berean, «harro sentitzen» direla esan digu Kontseiluak gizarteko taldea delako deituko diotako. X

Fluxa: «Plan estrategikorik gabe ez dago kalitatezko erakunderik»

■ Gizarte Kontseiluak planaren diseinuan partaide izan behar duela dio Larreak

Gorane Agirre / Bilbo

PLANGINTZA estrategikorik gabe kalitatezko erakunderik ez dagoela uste du Jose Maria Fluxa Espainiako Gizarte Kontseiluen Koordinazio Batzordeko lehendakariak. Fluxak EHUKo Gizarte Kontseilua egunotan Bilbon egiten ari den ebaluazio ekitaldian hartu zuen parte atzo.

Fluxarekin batera, Pedro Larrea EHUKo Gizarte Kontseiluko burua agertu zen hedabideen aurrean. Larreak azpimarratu zuenez, «dudarik gabe, Errektoreak eta bere taldeak plan estrategikoaren aitzindari izan behar dute. Baina, Gizarte Kontseiluak parte hartze aktiboa izan behar du plangintza horren diseinuan». Iritzi bera agertu zuen Fluxak: «Plangintza estrategikoa ezinbestekoa da egun unibertsitatea den arren, antolatua den formatu organikoan. Plana ezin daiteke inolaz ere agindu bat izan, erabat partehartzailea izan behar du».

Era berean, Gizarte Kontseiluen Batzordeko arduradunak «halabeharrezkotzat» jo zuen Hezkuntza Ministerioak LRUren erreforma garatzea. Ostera, azaldu zuen: «Unibertsitateko plan estrategikoak LRUaren malgutasun ezarekin joko luke behin eta berrir».

Hezkuntzaren estrategiak aldaketan garaia bizi duela adierazi zuen Fluxak. «Europar Batzarreko guztiak beren politika aztertzen ari dira».

Horrela, eurek garatuko duten azterketan, Unibertsitatearekin lotutako gai hauek jorratuko dituzte: finantzaketak, hezkuntza iraunkorra, Unibertsitateko sarrerak, irakasleria, eskaintza kurrikularra, kalitate plana, gizarte eskaria, edota lanbide heziketa eta unibertsitatearen arteko lotura. X

Gaurko eta biharko ekitaldiak

Bastida ▶ Bilera gaur Herriko gelan, Bastida, Bardoze eta Bidaxuneko herritarrentzat.

Elorrio ▶ Bertso afaria izango da gaur Alkartun, gaueko 21:00etan. Igor Elortza eta Oihane Enbeita ariko dira kantuan.

Elizondo ▶ Kartelada izango da bihar herriko kaleetan, goizeko 11:00etatik aurrera.

Plazatik abiatuko dira.

Uztaritze ▶ Bihar goizeko 11:00etan Euskaltzaindiari eta Iparraldeko euskaltzaleei omenaldia egingen diote Bilgune gelan.

Donamartiri ▶ Bilera deitu dute biharko Herriko Etxean goizeko 11:00etan. Donamartiri, Mehaine eta Donaztiriko herritarrak

bilduko dira bertan.

Izaba ▶ Bihar gaueko ordubetetik aurrera, dantzaldia izango da Drindots taldearekin.

Oragarre ▶ Bihar bilera izango da, goizeko 10:00etan, Herriko Etxean. Oragarre, Arrota, Martxota eta Behauzeko herritarrentzat izango da.

